



Convocatoria conxunta da Secretaría Xeral de Política Lingüística e da Dirección Xeral de Educación, Formación Profesional e Innovación Educativa pola que se aproban as bases e se convoca o premio a curtas de animación en galego elaboradas no marco do programa *Nós tamén creamos!* en centros de infantil e primaria de titularidade da Consellería de Cultura, Educación e Ordenación Universitaria no curso académico 2012/2013.

O Estatuto de autonomía de Galicia recolle a obriga dos poderes públicos de garantir o uso normal do galego e de potenciar o seu emprego en todos os planos da vida pública, cultural e formativa, así como de dispor os medios necesarios para facilitar o seu coñecemento. Por este motivo, o Decreto 79/2010 para o plurilingüismo no ensino non universitario de Galicia sinala a necesidade de aumentar o emprego do galego nas actividades complementarias e a Administración educativa procura fomentar o seu uso en distintos espazos e situacións de comunicación dos centros educativos, sobre todo a través da acción dos equipos de dinamización da lingua galega.

Por outra banda, a Lei orgánica 2/2006, do 3 de maio, de educación, contempla o logro da competencia nas dúas linguas oficiais das comunidades autónomas con idioma propio como unha das finalidades da educación, xunto coa adquisición de coñecementos técnicos e artísticos que aseguren o pleno desenvolvemento da personalidade e das capacidades do alumnado. Ao mesmo tempo, a comunidade educativa é consciente de que as aprendizaxes lingüísticas se fan tamén fóra das aulas de lingua e da importancia que ten, para a adquisición do galego, tanto a lectura neste idioma coma a motivación para usalo. Neste sentido, cómpre favorecer unha asociación positiva do alumnado coa lingua galega mediante a súa ligazón con actividades relacionadas coa cultura actual (audiovisual, TIC...), así como a vinculación afectiva que dá o uso do idioma no tempo de lecer.

En consecuencia, A Secretaría Xeral de Política Lingüística e a Dirección Xeral de Educación, Formación Profesional e Innovación Educativa,

RESOLVEN:

Artigo 1. Obxecto da convocatoria

O obxecto desta disposición é convocar tres premios a curtas de animación en galego elaboradas seguindo as pautas do programa de dinamización lingüística *Nós tamén creamos!* e regular o procedemento para a súa concesión.

Nós tamén creamos! é un programa da Secretaría Xeral de Política Lingüística e da Dirección Xeral de Educación, Formación Profesional e Innovación Educativa da



Consellería de Cultura, Educación e Ordenación Universitaria, en colaboración coa Compañía de Radio-Televisión de Galicia (CRTVG) e con OQOeditora. Os seus obxectivos son promover unha imaxe positiva e actual da lingua galega, favorecer o seu uso e aprendizaxe en novos ámbitos e formatos e dar a coñecer as opcións de ocio en galego que lles ofrece aos cativos a sección infantil do web da TVG. Para iso, ofréceselle ao profesorado participante:

- Unha sesión de formación inicial presencial e unha guía informativa que recolla os contidos da dita sesión e que permita aprender a elaborar sinxelos filmes de animación mediante a técnica de *stop motion*.
- Asesoramento ao longo do proceso a través do enderezo de correo electrónico nostamencreamos@gmail.com
- Lote de libros de OQOeditora.
- O recoñecemento como Actividade de Innovación Educativa, cunha equivalencia de 12 horas de formación permanente, para os docentes participantes, sempre que a curta realizada alcance os mínimos de calidade esixidos polo xurado, segundo o establecido nos criterios de valoración no Artigo 10.2 desta convocatoria.

Artigo 2. Características dos premios e dotación

Establécense tres categorías para as que se convoca cadanseu premio:

- Un premio destinado a alumnado do segundo ciclo de educación infantil.
- Un premio destinado a alumnado do primeiro ciclo de educación primaria.
- Un premio destinado a alumnado do segundo ciclo de educación primaria.

Cada centro premiado nunha destas modalidades recibirá un lote de libros de OQOeditora e mais un agasallo da TVG, así como un diploma acreditativo expedido pola Secretaría Xeral de Política Lingüística.

O profesorado participante nas curtas premiadas recibirán da Consellería de Cultura, Educación e Ordenación Universitaria unha certificación de Premio de Innovación Educativa.

As curtametraxes gañadoras serán emitidas, sempre que tecnicamente sexa posible, e difundidas en distintos programas da TVG.

Artigo 3. Beneficiarios

Poderán participar nesta convocatoria os centros de titularidade da Consellería de Cultura, Educación e Ordenación Universitaria que impartan ensinanzas de segundo ciclo de educación infantil e/ou de primaria.

Os equipos formados nestes centros para a participación en *Nós tamén creamos!* estarán integrados por alumnado e por un máximo de catro docentes. O profesorado



poderá pertencer tanto ao equipo que lle imparte docencia directa ao alumnado participante coma ao equipo de dinamización da lingua galega (EDLG). O alumnado deberá pertencer ao mesmo ciclo educativo ou, de pertencer a máis dun, competirá na categoría do estudiantado máis vello do grupo.

Cada centro poderá establecer cantos equipos necesite e realizar cantas curtas de animación considere conveniente.

Artigo 4. Inscripción e selección de centros participantes

Os centros que desexen inscribirse na campaña *Nós tamén creamos!* deberán solicitar a súa participación mediante instancia (ver anexo I) presentada no Rexistro da Xunta de Galicia, Edificio Administrativo San Caetano, s/n, 15781 – Santiago de Compostela, ou nos lugares e na forma previstos no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común. Se a solicitude é remitida por correo, será necesaria a súa presentación en sobre aberto para que o funcionario de correos poida selala e facer constar a data antes de certificala.

Unha vez rematado o prazo de inscrición, a Secretaría Xeral de Política Lingüística e a Dirección Xeral de Educación, Formación Profesional e Innovación Educativa seleccionarán 60 dos centros solicitantes atendendo aos criterios de data de solicitude, representación equilibrada dos tres ciclos educativos a que se dirixe a convocatoria e distribución territorial. En todo caso, terán preferencia os centros que non foron premiados na primeira edición de *Nós tamén creamos!* A escolla será publicada na páxina web da Secretaría Xeral de Política Lingüística (www.xunta.es/linguagalega/nos_tamen_creamos) e tamén lles será comunicada directamente aos colexios participantes por correo electrónico.

Artigo 5. Prazo de presentación de solicitudes

O prazo para solicitar a participación irá dende o día seguinte á publicación desta convocatoria na web da Secretaría Xeral de Política Lingüística ata o 1 de marzo de 2013.

Artigo 6. Desenvolvemento do proxecto

O persoal de OQOeditora poñerase en contacto cos centros seleccionados para fixar unha data para a sesión de formación e mais a entrega do material. A partir dese momento, os colexios poderán empezar a elaborar unha curtametraxe de animación baseada nun dos 14 contos entregados pola editorial.

Durante o proceso de creación, os centros contarán con asesoramento técnico no enderezo electrónico nostamencreamos@gmail.com



Artigo 7. Prazo de entrega das curtametraxes

O prazo para enviar a curta elaborada no marco do programa *Nós tamén creamos!* remata o 30 de abril de 2013. Os traballos deberán ser enviados ao seguinte enderezo:

Secretaría Xeral de Política Lingüística
Rúa Pastoriza, 8
15781 Santiago de Compostela

Cada curta de animación deberá ir acompañada dos seguintes datos:

Nome da curta

Centro educativo onde se elaborou

Nivel educativo do alumnado participante

Profesorado participante:

Nome e apelidos

Relación co alumnado (titor, profesor de educación física, membro do EDLG...)

Cada curta deberá presentarse nun sobre pechado e rotulado co seu título.

Noutro sobre deberán incluírse todos os datos dos autores e do centro, así como o título da curta que elaboraron.

A medida que se vaian entregando, as curtas poderán verse na sección *Nós tamén creamos!* do web infantil da CRTVG: www.crtvg.es/infantil.

Artigo 8. Características técnicas das curtametraxes

As curtametraxes terán calidade DVD e unha duración máxima de 5 minutos.

Artigo 9. Envío das curtametraxes

As curtametraxes, acompañadas da información do colexio participante, deberán ser enviadas por correo postal certificado ou a través dalgún rexistro oficial ao enderezo indicado no artigo 7.

Artigo 10. Comisión de selección e criterios de valoración

1. Comisión de Selección

Para a selección das curtametraxes crearase unha comisión que estará presidida pola persoa titular da Subdirección Xeral de Planificación e Dinamización Lingüística, ou persoa en quen delegue, e integrada polos seguintes membros:

- O/A titular da Subdirección Xeral de Ordenación e Innovación Educativa e Formación do Profesorado, ou persoa en quen delegue.
- Un asesor ou asesora técnica da Secretaría Xeral de Política Lingüística.
- Un representante da CRTVG.
- Un representante de OQOeditora.



A comisión poderá dispoñer a constitución dunha subcomisión técnica especializada para colaborar na valoración daqueles proxectos que coide pertinentes, que poderá estar integrada por asesores e asesoras de Innovación Educativa e de Política Lingüística, persoal da CRTVG e persoal de OQOeditora.

2. Criterios de valoración

Valoraranse os proxectos atendendo aos seguintes criterios:

- Corrección e expresividade lingüísticas (40%)
- Orixinalidade e calidade da proposta gráfica (40%)
- Calidade técnica (20%)

Artigo 10. Resolución

A Comisión de Selección, unha vez estudadas as solicitudes presentadas, emitirá a proposta de resolución dirixida aos titulares da Secretaría Xeral de Política Lingüística e da Dirección Xeral de Educación, Formación Profesional e Innovación Educativa.

A resolución conxunta da Secretaría Xeral e da Dirección Xeral publicarase na páxina web da Secretaría Xeral de Política Lingüística www.xunta.es/linguagalega/nos_tamen_creamos no prazo máximo de 4 meses, contados dende a publicación desta convocatoria. De non facerse así, os solicitantes deberán entender desestimada a súa solicitude.

Artigo 11. Difusión das experiencias e materiais elaborados

Os traballos premiados serán publicados na pestana *Nós tamén creamos!* da sección infantil do web da CRTVG e difundidos en diversos programas da cadea. Tamén poderán difundilos a Secretaría Xeral de Política Lingüística e a Dirección Xeral de Educación, Formación Profesional e Innovación Educativa.

A presentación a esta convocatoria implicará, no caso dos traballos premiados, a colaboración nesta ou noutras accións de difusión que se organicen, así como a cesión dos dereitos de edición a favor dos organismos convocantes.

Santiago de Compostela, 31 de xaneiro de 2013

O secretario xeral de Política Lingüística



Valentín García Gómez

O director xeral de Educación,
Formación Profesional e Innovación
Educativa



Manuel Corredoira López